

64851

三

4





是訓采獲舊聞考述詩書而其文則職方氏可尋源而按者其中錯綜天地點綴宇宙如畫史矣

淮南鴻烈解卷四

墜形訓

墜形之所載。六合之間。四極之內。昭之以日月。經之以星辰。紀之以四時。要之以太歲。天地之間。九州八極。土有九山。山有九塞。澤有九藪。風有八等。水有六品。何謂九州。東南神州曰農土。正南次州曰沃土。西南戎州曰滔土。正西弁州曰并土。正中冀州曰中土。西北台州曰肥土。正北濟州曰成土。東北薄州曰隱土。正東陽州曰申土。何謂九山。會稽。泰山。王屋。首山。





荅潞安胡司理啓

賀冀南道王方伯啓

先大夫崇祀鄉賢請黃父母啓

賀冀南道王東里少叅平徇奏凱啓

荅程泰雲太守賀禫除啓

請澤州王慶我太守初任啓

候羅宗伯座師啓

荅唐大愚司馬郎啓

送治院蔣午節啓

送撫院唐午節啓

賀湖廣宋按臺元旦啓

候山西張學憲啓

請宋按臺啓

賀分守道徐扶搖憲副新任啓

荅張葆光侍御啓

請張鵬海父母啓



賀宋又希中丞啓

賀方書田拜相啓

賀汾州焦太守啓

候周座師啓

賀冀南道王賓吾老師初任啓

賀許座師壽啓

賀冀南道公祖啓

賀隣父母考滿啓

賀澤州太守韓父母啓



大中丞苗晉侯先生文集卷四

高都苗胙土 著

後學趙日暉

較閱

汾陽朱之俊鑒定

甥 趙嗣彥

男

苗士寅

同梓

苗士容

駢啓畧抄

傳臚後公請孟晉純少宗伯啓

伏以天運崇文八面網開闡苑地靈助藻一方



鵲起行巔偶貂續之濫塵敢曰花添一錦惟龍  
文之仰止遂爾附托前脩恭惟台臺國器昂藏  
人倫標的八磚視影紫霄橫畫現之虹三島呈  
祥青箱發夜藜之彩範禮樂於中秘再觀吉甫  
興周陳謨訓於青宮復覩伯夔相舜鹽梅鼎望  
舟楫濟川某等鹿鹿庸流魚魚賤品斗山在望  
欣模範之當前河漢分波對汪洋而增色茲屆  
觀光之日愧蠅翼未足乘風辱生發祥之鄉對  
鳳苞儘可瞻斗謹擬月之某日恪具蟻尊言攀  
騶從煙凝翠嘯願分瑤鳥之餘輝露浥黃花普  
錫綺筵之藻色冀惟金諾佇聽玉霏



迎吳代巡啓

伏以金鉉秩峻夜分太乙之元輝繡斧霜嚴朝  
看神羊之懋節江上卿雲日麗關中紫氣新來  
恭惟台臺聖甲熙朝才稱命世洞庭凝碧毓成  
冰雪凜貞標香水飛黃代裕經綸光偉闕花封  
來暮栢府崇登身憑日月翩翩兩袖晴霞手握  
風雲湛湛一腔甘露茲聖明之特簡式渭水之  
夙靈爭誇桓馬自天來郊野狸狐膽落獲藉朱



衣而虹燦溪塘鷗鷺機忘凡諸卑吏倍切崇瞻  
職下品鹿魚山陬草木頻年郎署媿參計之罔  
功分采江濱覺垂綆之益短當此高懸玉尺百  
城之憲德宜人佇看朗射璣衡一堂之法星照  
膽欣逢大乘願佐下風廼簿書匏繫未負弩以  
前驅然肝膈葵傾謹削竿而祇候伏願台臺蚤  
馭青驄百二秦川增色攸行黃道千尋華嶽改  
觀職臨啓無仞翹首欣企之至

荅趙開吾給諫啓

伏以青蒲日麗聿崇補袞之班白簡霜明爰振  
批鱗之節端人領袖國是提衡恭惟老父母年  
臺臨風玉樹映日金莖肩奇藻於子雲胸多玄  
草敷仁風於潘令野有遺棠身領八表之人倫  
出萃三秦之異氣宸衷眷注特宣丹詔以徵賢  
公論顯昂遂陟黃門而司諫燕山鳳翥都人盡  
望風裁漢水雲橫閭里暫瞻輝潤某魚魚下士



鹿鹿散材久叨屢覆幸依赤舄之餘光行役江濱獲近紫芝之僊度有懷請益自分深緣顧鉛刀難割寸地每驚於望洋而短綆易窮諸城或窘於坐照臨民多畏對影生慙伏蒙遠頒文幣充庭皆輝映之殊光重以下錫兼金射函盡璀璨之寶氣睹茲腆渥益媿匪涼拜手瑤章肅歸掌記某臨啓不勝感勒瞻企之至

賀關中各院年節啓

伏以祥開六宇卿雲騰麗日之輝春滿千林淑氣霽清霜之肅爰綏介祉茂對昌辰恭惟台臺猷宣七政德釀一元斗柄心懸直孕異靈於赤壁璣衡手握旋增曉色於秦川披和而都鄙揚暉南有箕北有斗從茲布轉吹律而柳楊入笛動爲陽靜爲陰莫測津涯共看寸地生春屬有百城霑潤三陽化暖氤氳開鴻鴈之床萬彙昭



蘇縹緲應旌旄之瑞職自分人間散木譟棲上  
苑一枝枯莖誤被夫鴻鈞長養有自鉛刀盡造  
於大冶剗割無能莫遂鳧趨恭伸椒獻伏願台  
臺履和聚順崇祉與旭日以偕長升吉宜人駿  
業同華嶽而竝峙職臨啓無仞踴躍遙祝之至

荅澤州秦父母啓

伏以應三刀而剖竹瀾安閩海之波荷一札以  
傳梅香繞燕臺之月久殷蘊結夙在幘幪恭惟  
老父母台臺世冠南中恩沾晉土來暮是詠至  
今頌在于山間綠竹是歌此日政成于海上撫  
昔士民之旣阜堪茲冰玉以平分萬里持符復  
圖南之廣運雙旌出守漸向上以崇高聳梗楠  
大廈之材振經濟巨川之用仰芳猷之兩播毫



端宜育物之仁知儒術以兼資寓內著驚人之  
語茲逢聖明於舜禹卽需弼輔於臯夔每懷雲  
表之光儀長望日邊之瑞彩傾心燕市如遲紫  
氣於關門延首并州佇借清時之開府某任愿  
叅籌榮叨世誼結思先往倏頌尺翰之琳瑯佈  
復遙將祇抱寸衷之惶悚惟希電炤曷旣神馳

荅天津道石副憲啓

伏以法星高照常開海畔之雲瑞氣弘敷喜近  
長安之日光華峻陟品物咸享恭惟台臺世美  
秦中膏凝燕地巍然華嶽接氣宇之崇高浩矣  
洪流聯詞源之濬秀振采科名於盛代策功經  
濟於清時昔領專城朱旆運行春之雨茲升秉  
憲赤符傳靖夏之風氣凜於東南綜理騰車躍  
馬望森於中外具瞻承露檠天卽銘勲業於雲



霄先藉清澄夫陸海某承乏非才願安是教道  
車未熟望曲惠以司南筭斗逾涯每披懷而慙  
內謬垂瑤翰重以珍儀斗室春生疑卿雲之璀  
燦寸心篆刻同朋錫之崇隆謹歸璧以爰將祇  
肅函而宣謝伏惟霽炤曷旣企瞻

荅潞安胡司理啓

伏以天驥遐騰剡忽風行萬里龍淵在握寒芒  
電射三光露灑憲廷薰來編戶恭惟老公祖台  
臺東南靈氣山海偉人身金粟而轉宰官根器  
自超塵外才揆天而學窮海文章特邁時流明  
允譽高蒨屋仰秋光之照慈祥恩溥棘林消夜  
哭之聲垂哀矜勿喜而得情道上豺狼斂跡釀  
清靜和平而致治灘頭灘瀾呈祥貫索星沉狂



徒咸稱福地名欄瑞靄駟馬佇見高門蓋繡斧  
之夙望攸歸而鑄世之鴻猷蚤定者也某自分  
糝糠載同魚鹿適值三韓多事數米難炊復思  
徧地徵求無皮安附未俾持籌之半臂實羞轉  
運之專司茲爰辭東務濫典西陲前渡迷茫深  
媿津梁之莫問連雲巉屹遙知攀躋之維艱遠  
承注存益懷悚息某臨啓曷勝感勒依切之至

賀冀南道王方伯啓

伏以黼座疏榮僉喜望霓瞻方岳師門戴德猶  
思立雪侍維藩節鉞颺輝參苓絢采恭惟老師  
台臺直方而大清任以和風疾馬蹄香春泛曲  
江之畔日濃棠芡茂蔭垂濩水之陽冰凜樞曹  
而苞苴盡絕雪清憲府而壁壘改觀四壁圖書  
更乏一錢可選千秋著蔡頓令三代長存迺主  
眷彌隆而台階愈峻除書高捧光聯潞子激瀾



寵詔特宣色帶黨天顙氣兒童騎竹共懽舊澤  
與新威父老昂眉忽見興利而除害并州念切  
重來草木皆榮黃閣推先顯擢鼎鉉竝重頌揚  
甸衛慶洽矜簪某材散如樗質粗類砥矐懷夙  
教依然臯席春風快聽明綸屹矣豸臺霜月惟  
是里門甫入正形神之俱勞以斯幢旆久臨坐  
筐篚之獨後獻羞芹綠祗肅戒於三薰傾欲葵  
丹冀頰垂乎一盼莫勝濶節統恃崇曦某臨啓  
曷旣踴忭瞻舞之至



先大夫崇祀鄉賢請黃父母啓

伏以盛世簡循良爰重神明之度鄉邦嚴月旦  
載崇司直之風一字品題千秋珍錫恭惟老父  
母台臺泰嶽元精鄒源名世探文石室適傳闕  
里之宗剖竹山城復覩青州之化吏不驚犬惠  
偕八風以俱翔人無喘牛仁與五材而竝運祥  
開聚順兩階芬函德之芝澤普噓春六野霑隨  
車之雨更以對時育物推之聞履存簪採輿論



於同符士林增氣褒幽貞於旣杳寒谷成暄某  
僅讀父書恒慙家學對此陟降空勞明發於庭  
除感切烝嘗幸賚思成於俎豆謹諏某日肅滌  
三觴溪澗沼沚之毛敢云明信絃誦詩禮之地  
端賴式矜色笑可挹星斗生黌宮之物彩旌旂  
于邁天風動碧泮之文章伏冀龍臨可任鵠俟

賀冀南道王東里少叅平徇奏凱啓

伏以運際昌辰泰象高橫斗北勲隆偉伐師貞  
再造山陬藪澤增輝士民胥慶恭惟老公祖台  
臺灑節凌霄冰心盈臆地靈凝傑彩毫激東海  
之波星聚應占勁氣帶岱宗之骨西天露灑千  
屯夜月飽春風粉署香含九塞淒笳開霽色楓  
宸睠績薇省分猷縣知玉尺重西陲繇斯簡書  
來北闕顧茲新政時聞照屋之星噲彼後夫其



作嘯風之鬼海至狠心不戢共驚虎翼堪憂然  
野有青燐幾成鼠牙羊角事如有待迺胸函黃  
石日無豕躅鶚音道在人行一旅爰征陡見旌  
旗耀日三旬宣捷爭看風雨洗天以之變定蕭  
墻俄而計安反側行岫煙煌晝靖冠君之綏亂  
同符晉城烽井塵消方叔之壯猷再烈燕然必  
勒卿月將輝某志急請纓才難借箸睹國門之  
赤丸頻探少木皆兵欣大地之白日重光雲霓  
滿目蓋以文事而饒武畧赫然丕著殊勛將繇  
外寧而釋內憂久矣宜膺崇報瞻依孔切怵蹈  
維深某曷任企躍祝賀之至



荅程泰雲太守賀禪除啓

伏念某三稔苦次百緒灰寒對易邁之居諸慨  
茲駒隙懷終天之悽愴媿彼烏私慟悲時來音  
容日杳顧孽身未老蚤茸爨下之焦桐黃菊可  
餐謬學雲間之間鶴願傾耳乎穠蔭匝地惟昂  
首於大業叅天猥辱台臺當露灑金秋浥澗不  
遺草壤想風清鈴閣喁噓載及山陬拜手登嘉  
悼心鳴謝某臨穎主臣不旣感勒



請澤州王慶我太守初任啓

伏以鳳藻夙聞五色燦丹巖之秀熊車初蒞雙  
旌拖紫綬之光幸瞻嚮之方新知覆載之日大  
恭惟老父母台臺鴻才超世高韻照人秋水凝  
神滿臆注金莖之液桂華同馥寸管開玉井之  
蓮迺譽聞上逮彤墀遂福耀朗縣晉野花栽兩  
邑清芬久播於一方竹剖專城循政蚤騰夫三  
月爰當戎馬內馳之會白羽頻傳因塵黼扆西



顧之懷丹書遄下千煙入夜冷崆峒王屋之墟  
誰言鎖鑰五馬頌天來平水龍門之際頓厚齒  
唇甫三浹旬而塵淨雲閒已見霜威載肅將一  
彈指以民康物阜行看化洽無垠某欣曝秋陽  
待挹冬日屬在萬屢之一期無暮雨相侵願作  
四民之倡恒向卿雲共戴謹諏某日肅薦初筵  
對此花開籬下如遲色笑於朱輪矧夫露墜簾  
前恍灑汪洋於白屋佇儼飛鳥之臨用光採蘋  
之獻某具啓不勝瞻望顒切之至



候羅宗伯座師啓

伏以秩崇北斗光依禮樂以持衡寵渥南宮彩  
振旂常而曳履深懷永德企仰新禧俯控輶函  
肅干記室恭惟師臺楚江毓秀漢殿標奇丰度  
峻嶒嶽麓琳瑯開四照才華激灑熊湘澄澈朗  
千尋文章揮班馬之毫聲揚鶴禁事業接夔龍  
之武采煥鰲扉三禮寅清夙夜緝熙規聖學一  
心啓沃後先弼亮潤皇猷縣水鑑於胸中牝牡



驪黃悉歸剪拂握文樞於掌上參苓杞梓盡荷  
甄收夾輔深衷丹陛行瞻作礪均調大業紫綸  
立聽卜甌某西晉綿材荆南冗秩駑蹄伏櫪倖  
邀盼睽以前驅鶴翮捨榆謬藉吹噓而後健未  
申涓埃以達悒懔迺混采葑而司鎖鑰盈盈漢  
水幸覲德之非遙望望羅山悵問奇之無自蹊  
桃欲笑倍思化雨於狄門江柳初眠頰憶春風  
於程座敬緘蟻烟恭候鴻禧統冀鑿涵靡殫

仰銘

荅唐大愚司馬郎啓

伏以采振彤闈光贊鴻樞之重香含粉署班聯  
螭陛之榮仰斗心勤開函色喜恭惟老年臺秀  
濯三湘才雄九辯摩空獻賦超東南之實於機  
雲遊亦發硯檀銅墨之良於卓魯稜稜風節蚤  
起望以蜚鴻翮翮羽毛遂升華夫騎省帷籌勝  
算允稱數萬甲兵樽俎折衝何止六三韜畧佇  
觀節鉞之重寄載欣鉉鼎之先資某承乏非宜



願安是教道車未熟聖曲惠以司南筭斗逾涯  
每披懷而恧內謬垂瑤翰繼以珍儀斗室生春  
疑卿雲之璀璨寸心鏤刻埒朋錫之崇隆謹歸  
璧以爰將祇肅言而宣謝伏惟霽炤曷勝企瞻

送治院蔣午節啓

伏以虎節疏榮映九畦之蘭浴龍標煥采際五  
葉之冀開茂對芳辰恪申芹曝恭惟台臺聖高  
南斗聲振北辰風動五絃萬姓仰噓植之澤霜  
嚴三尺百僚凜震疊之威睠結艾而省民安時  
逢令序芟茸棠而占歲順化普泰平舜日方升  
應有延齡之彩縷越裳可格寧煩祓境之靈符  
立晉卜甌佇膺調鼎某榮叨托屢庇切依臺敢



布寅忱肅將芹獻用乖六日深慙金縷以聯文  
望屬二天聊玃玉蒲而進酒仰惟海茹無任巖  
瞻

送撫院唐午節啓

伏以化日揚靈明鏡高懸全楚熏風奏爽碧幢  
大轉中天喜對昌期介膺純嘏恭惟老師台臺  
斗南碩望台北英標萃河岳之精華蒼壁與天  
球竝瑞稟扶輿之正氣清霜共烈日爭明亮采  
惠疇適逢乎令節飭戎振旅化普乎泰平周頌  
宜男玉粽祥呈九子箕書歛福彩絲邪辟五兵  
虎帳天開行見袞衣光日月麟圖帝紀立聽綦



履上星辰職久切葵私幸沾蘭沐烹蒲進學幾  
思忭舞於臺端削牘濡毫徒爾稽棲於漢邸敬  
裁蕪語上賀崇禧丙鑒惟榮寅衷罔旣

賀湖廣宋按臺元旦啓

伏以三陽載啓卿雲遙繞於紫薇萬象重熙淑  
氣蚤臨於蒼角履端協吉寰宇丕欣恭惟台臺  
德意春融威稜冬凜舌底吐驚人之語鴈塔流  
芳毫端宣育物之仁花封騰望青驄夜秣共欽  
風節於埋輪白簡朝飛獨揭肝腑於焚草廼藉  
西臺之謨畧特專南國以澄清茲當白雪消寒  
人見青陽布煖石磨千丈碣五風十雨恍同披



拂於堯天人浸萬家春七澤三湘盡覺舒長於  
惠日椒盤開宴擬生榮戟之華爆竹鳴雷振起  
閭閻之色職某對此歲序聿新縣知崇禧駢集  
屬惟遠服阻賀嚴臺敬摘下里之音頰祝如天  
之福伏願祥鍾奕世佐聖曆於綿長春靄千林  
應鴻猷而炳赫

候山西張學憲啓

伏以憲節天開三晉葑菲沾化雨文旌日麗百  
城桃李舞春風莫罄敷宣祗深企仰敬披竹素  
馳候芝顏恭惟老公祖台臺才振關西望隆斗  
北渭源澄澈人驚滾滾之詞瀾蓮嶽巖凝世仰  
崑崙之氣槩鳧踪縹緲嘉猷久茂棠陰鷄舌芬  
芳令譽丕揚蘭署載膺法憲特飭文衡縣水鑑  
於胸中牝牡驪黃咸歸剪拂握玉尺於掌上參



苓杞梓悉荷甄收彩筆輝流已見英標明日月  
袞衣寵錫行聽綦履動星辰望切垂青忱殷盼  
紫某自慙樗朽叨通芳華昔塵纓綬於漢南夙  
懷芝範今被鈞陶於宇下涖厯冶鎔曳尾繫匏  
莫施敝裾於憲陞濡毫勤楮敢馳鄙悃於文壇  
伏冀鴻慈俯殫雀臆

請宋按臺啓

伏以鷺軾南來江漢挹澄清之氣豸袍正蒞簪  
紳瞻峻整之儀篋來深切夫吏民景式蚤孚於  
遐邇恭惟台臺玉潤金精春溫秋肅金粟凝碧  
毓成冰雪凜貞操長水飛黃敷出經綸光偉伐  
花封來暮栢府崇登身冕日月翩翩兩袖晴霞  
手握風雲湛湛一腔甘露茲聖明之特簡式陔  
壤之分靈爭誇桓馬自天來社下鼠狐膽落因



藉朱衣而虹燦湘中禾黍春生樹崇標於貞度  
肅僚嚴霜比質乘正色以揚清激濁烈日生成  
近膺斗北新綸按部荆南要地分九天之景燦  
壯三峴之旌旄百辟擬承風讐一角神羊之觸  
萬民思覆露快五花驄馬之來從容攬轡而楚  
山玄嶽將爲動搃指顧行春而珮渚鴨江佇聞  
震疊斗山在望丰度是欽某等願埒鷓枝材同  
散木盼龍文之紫氣久懷擁篲之私抒燕喜之  
丹衷不罄傾葵之想夙知天高霄漢心亦慕乎  
披雲乃茲水近樓臺情更殷于得月端諏某日  
肅薦初筵暫拂薰風仰睇德星之下照永懷朗  
魄祈挾爽氣以爰臨佇聽鳴鸞惟有拱鵠



賀分守道徐扶搖憲副新任啓

伏以楓陛宣綸雅著叅藩之駿望臬臺飭憲榮  
分攬轡之鴻猷倚玉增輝彈冠馳賀恭惟台臺  
鏡湖毓秀寶崖耀靈丰度璘珣筆灑龍門珠萬  
斛英標煇灼品超鰲壑錦千層績爰茂於花封  
平遂章於棘寺皇華映日覃敷解網之仁朱轂  
聯雲丕著褰帷之澤揆文奮武鎖鑰倚重於北  
門貞度肅僚紀綱聿崇於南國行聽曳履立見



卜甌某自愧散樗叨分憲節慙穢形之在側企  
仰高風幸芳軌之可遵光依明月謹裁蕪札恪  
展芹悰莫殫燕賀之殷勤尚冀鴻光之鑒納

荅張葆光侍御啓

伏以蘭臺日麗金陵繡斧生威栢府霜凝玉署  
驄輶振彩十行遙賁五內深啣迺披牘擬增慚  
聊疏衷而布臆恭惟台臺泰階良弼鼎軸名卿  
擘畫精瑩武緯共文經而竝肅聲靈赫濯內安  
合外攘以流徽柱下射鵬習習風凌殿閣臺中  
縣豹巍巍名滿乾坤斗北宣綸其切鼎衡之望  
江南聽履獨高衮鳥之榮某俯媿塵踪仰思斗



範值封疆之受過身已投於溪林企澄清之鴻  
猷心實殷於訓誨霓械芝簡訝闕寶於鮪宮瑋  
意琛情倍襄章於織宿對此隆誼惟有飽德臨  
啓無仞瞻切感勒之至

請張鵬海父母啓

伏以治象天開黼座重親民之寄循猷風動山  
城近化國之春雄名北斗齊高福曜西躔獨朗  
恭惟老父母年臺氣涵天寶才擅國華鴈塔文  
新五色燦金鰲於海上藥宮譽重一班試銅虎  
於山陬吏仰霓明有似然犀照水民稱神牧不  
殊五袴興歌聲施已播於崇朝政成安俟夫期  
月諗見秋霜堪對潔比冰壺共欣冬日可親和



同醇醴蓋胸蟠經濟暫領斗大一州將階躋崇  
高行看雲開八座某行山散櫟漢水敗鱗幸依  
斗極之光華願沐天邊之雨露况系同蘭譜馨  
聞豈靳於陳人抑衷切星臨晞照寧遺於白屋  
謹諏某日肅庀初筵微舒對時育物之懷用展  
瞻雲就日之悃野芹可採爰擎杯酒祝三多赤  
臆何窮且向一趨追四履情深雀埃望竚龍光

賀宋又希中丞啓

伏以日麗旌旄元老重封疆之寄天宣綸綍明  
廷新錫命之恩道合明良歡騰士庶恭惟老公  
祖年臺精忠貫斗正氣干霄身繫安危懋著澄  
清宏績威被侯甸昭宣安攘訐謨合三關之吏  
弁盡倚生成屹千里之金湯雄稱保障威名邁  
布簡在愈隆展龍韜以肅紀綱固見光生壁壘  
除狼跋以歌耆定將占功勒旂常治某情殷托



屢喜溢安瀾匪獨謂正人柄用欣彈此日之冠  
兼慶夫西鄙有緣近沛崇朝之雨鳧趨未克雀  
賀遙將伏冀台涵俯垂鑒茹某臨啓可仞歡忻  
瞻仰之至

賀方書田拜相啓

伏以紫庭當軸經綸維社稷之安黃閣運籌指  
顧致邊陲之靖萬國函蒙大造一人眷顧元勲  
恭惟老先生台臺殿邦良弼名世偉人清任和  
而出之以中直方大而歸之於正窮理盡性至  
命真傳道統於聖人責難陳善閉邪久迪忠規  
於天子茲者干旄纔入於鼎司楓陛頓開乎泰  
運繁機悉賴化瑟更調洞照隱微操止水至清



之鑑憂深根本畫安盤長謐之圖謀斷竝殫厥  
心燮和如運於掌頃當潢池弄挺芴躡諸藩兼  
之海外揚波洊吞屬國帝顧東西之堠人驚赤  
白之囊戡定巨艱允資名相行將執訊連連盪  
洗櫬槍稜氣自宜迂衡穆穆明章台斗祥光蓋  
秉政有人文事兼有武備用儒無敵外寧豈患  
內憂當晉錫三公之徽冊且恒垂萬禩之美談  
某庸賤質窳瞽微踪馬渤牛溲夙在藥籠之  
末鼠肝蟲臂偕遊化育之間十七年一意茹荼  
飜成唾面一二事妄思忠國誰亮枯心生來媚  
骨都無何怪謗書遄至千里懷鳧趨之悃一箋  
伸燕賀之私伏願永扶日轂丕亮天工調六氣  
以播鴻鈞奏中書二十四考稽五辰而凝庶績  
襄上治萬八千齡某翹首門墻不勝歡欣企切  
之至



賀汾州焦太守啓

恭惟老公祖台臺天上斗牛人間星鳳江花開  
筆底揮成錦字生香郢雪落歌中調出清聲歛  
冷飛鳧標異常留春意於郊圻佐郡揚芳更炤  
秋毫於蔀屋甫見握符潞水再爾剖竹汾濱蓋  
惟帝眷此一方民實勤軫念故勞君重領二千  
石特簡循良蒼生耳目聿新赤縣恩膏如舊治  
某自分魚鹿久沐汪洋昂首仰龍光樞趨未效



於童叟披忱將燕賀翹企倍深於主臣惟冀巨  
雲遠庇慶出尋常更祈滄海兼容鑒茲涓滴臨  
啓不勝瞻切之至

候周座師啓

伏以日升天部崇高紫極之光風肅春曹優渥  
彤庭之寵應上辰之仰鏡在下吏以瞻巖况屬  
門墻惟勤踴躍恭惟老師華嶽鍾精洪流濬德  
振科名於盛世燦然黼黻文章著勛績於熙朝  
偉矣經綸濟美揆留皇鑒忠簡帝心綜理文衡  
必舉材而應器獨持品蒸惟度德以求賢握端  
操乃百家之宗秉正笏爲四銓之首關西夫子



運鴻鈞八表之春江左夷吾輔鳳晨萬年之統  
世叶周詩於吉甫道符虞典之夔龍庶績咸熙  
寰區具慶某叨從桃李久披春日以呈輝修阻  
山川頻切雲霄而展戀荷師座陶甄之力得王  
廷干祿之榮銘刻倍勤佈荒儀之寥寥瞻依高  
厚祇積慙之惓惓謹肅寸函遙申賀悃仰祈台  
鑒俯賜霽涵臨啓曷任惶悚瞻馳之至

賀冀南道王賓吾老師初任啓

伏以憲府崇勛久著提綱之譽臬司重任時分  
借箸之榮地當右輔以臨燕位陟上賢以鎮晉  
有嘉王佐於赫聖謨恭惟老師台臺品正天中  
聖隆海內吸太和清淑之氣貫道義以中存領  
熙朝綱紀之權藉忠貞以外寄踴躍哲人之崛  
起助勳世運之大亨寵命頒新遠動五雲於色  
燦德操仰舊溥和三晉以春溫協天瑞以應人



撫時康而濟國昔茂棠陰於濩澤竝沾波潤於  
河汾匪獨兩地之瞻依寔荷二天之覆育鴻鈞  
運力并州之草木盡屬栽培鳳舉呈輝鹵地之  
風雲悉由鼓舞允卜昇平之有象重逢喜豫以  
無涯願早發於弓旌而萬仞雲煙助其脂轄恭  
再瞻於山斗乃百城禮樂賴以持衡仁霑八郡  
以承風恩洽萬家而覆露帝心簡注同推范老  
之殊功師表光儀再接歐公之雅訓某龍門誼  
舊燕屢情深地近披雲尚阻躋堂之拜路通傾  
日惟勤實篚之儀肅布賀忱兼申候悃伏祈霽  
照曷任淵涵



賀許座師壽啓

伏以日麗青陽佳氣郁旂常之色春生碧樹明  
光發弧矢之祥恩放鵠以酬知謹裁魚而爲壽  
寅惟老師台臺文章董賈事業伊周荐鸚連鰲  
丹桂枝頭紅杏放飛鳧振鷺綠棠陰裏紫薇芳  
一代仰其鳳鳴凜凜簡霜寒殿陞九重令之夔  
典熒熒卿月貫几筵拭目看秉鉞之綸榮疏八  
座昂眉覩添籌之屋瑞啓千秋人咏生申觴獻



萬年斟北斗時逢建卯冀開七葉燦南山集繁  
祉而頌岡陵依末光以瞻日月某遇荷國士才  
本衆人戴地天而報無能久稽犬馬塗肝腦其  
身有限益慙蟻蠓敬祝五福之先悵趨庭而阻  
跡肅將一介之使顒函丈以旌心伏願永茂椿  
齡勲伐昭垂乎鉉鼎頻更月旦齒牙莫惜於冶  
鍾某臨啓曷勝翹祝忭企之至

賀冀南道公祖啓

伏以三晉春和協經緯濟時之政九重寵渥備  
勛勤秉節之司瞻瑞氣於一新頌德音於四起  
閭閻交慶冠冕沾榮恭惟老公祖台臺太華凝  
神洪流緒世一鳴楓陛揆文華白雪飛揚千丈  
松巖振芬響清風浩蕩接蒼蒼於上黨巍然品  
望崇高著赫赫於中朝允矣勲猷遠大何慮四  
郊之多壘久推萬里之長城振虎旅以前驅而



紫電清霜悉由鼓舞握鴻鈞以獨運而碧桃紅  
杏盡屬栽培藉浚心練達以銘功俱延首治安  
而在望某情溪踊躍屬庇幪幪依鄰日月之輝  
彌切斗山之仰每倦倦而引領尚阻鳧趨謹  
老以函儀祇申燕賀伏惟淵照曷任瞻依

賀隣父母考滿啓

伏以績懋循良播三載蜚英之譽恩頒綸綍承  
九重覃被之庥闔邑歡騰鄰封忭舞恭惟老父  
母台臺性地晶瑩心源朗映涵今茹古迥冀北  
之豪賢炳外閤中挈燕臺之領袖天人射策於  
楓陛民社綰符於里闔玉立冰清閱世明侔觀  
火風行雷厲匠心妙若轉圜偉畧夙閑逸才天  
縱琴鳴堂上凌宓子以高聲花滿河陽擅安仁



而竝美德化魯中牟之馴雉劑調楚柱史之烹  
鮮頃當課最之期快覩有成之緒諫垣虛左佇  
看內召以拜黃寵秩異常卽命上才而拖紫同  
欣踐斗於指日且更擊節於當年某等素沐旉  
幪仰叨河潤幸瞻鴻範無繇趨賀臺堦望切龍  
門祇恐輜輕記室謹遣小力用達微忱敬肅寸  
箋聊申鄙悃不盡寅誠統希丙鑒臨啓無任主  
臣依瞻之至

賀澤州太守韓父母啓

伏以五馬爰驅欣剖符於天上雙熊按部看露  
冕於晉南歡重山陬祥開桑麥恭惟老父母台  
臺清徹壺冰祥鍾瑄玉才華磅礪映瞿塘三峽  
之流氣節嶙峋帶劍閣千峯之秀頃軼蘇湖而  
著範已看桃李盈門今舉郡國以分猷更見其  
棠夾道一帶汾晉之水應知清似使君千秋邵  
伯之湖豈容美專前詰政成不日福照如天士



民已坐於春臺鯨鯢將潛乎夜月牛刀甫試卽  
聞章袞之歌鳳詔爰宣佇下璽書之召某碌碌  
劇曹肌骨化爲糠粃悠悠塵客肚腸純是茶蓼  
幸台臺夢叶三刀俾宇下光分半壁無長鬚可  
命媿脩賀之已稽托短楮將虔冀鑿原其不腆  
萬間廣廈欣無夜雨相侵徑寸枯荻尤願春風  
早到某臨啓曷勝歡忭遙瞻之至



